

北

軒

集

一

北軒居士集目錄

卷之一 初年錄詩

全州

淳昌

康津

濟州

次冲菴韻

父雨

小晴

大靜道中

次紫極宮感秋

溪舍偶吟

次鄭仲父江都歌

卽景次仲施和仲父

自鎮海寺將

赴月串未果

臨津感舊

夜坐次杜宿府韻

金陵雜詩次杜

江村韻四首

開窗

曉起口占

臘日用杜韻

曾祖母諱辰

除夕以

亂山殘雪夜
爲韻逸三

煮艾

夜吟次韻

雨中用簡易韻

星河

圓明寺

朴淵

二首

自雲興寺登城上

遊圓通庵

新秋

二首

猪灘

漫吟以悲哉秋

氣蕭瑟
爲韻

申大將

汝哲輓詞
四首

谷雲輓詞

二首

新秋

李判書

世華

輓詞

三首

向扶安配所到

露梁作

別蘆山

三首

公山

二首

栗浦

發金堤

到配作十韻

弟雲從卽歸

漫吟

夜懷

北風

二首

十二月二十二日

除夜

鄭生鎮河見訪

新春

三首

鄭生

仲久之子也爲長句以贈

出步所居門外

早春

登向巢嶺

三首

絕句

二首

寄金生得孫

奉贈水村金丈

楚山詩送德叟

羅州鄭生

運衡來候不能無語

邑宰送酒

雨二首

贈鄭友直

次韻答嚴義吉

夜吟

送人還京

風不止

出遊城隅作

康津尹生來見草贈

金友兌孫來書贈

喜雨得霽字

送德叟歸

夕望

贈羅生星奎

殊方

田氏園作

高家村望海

遊邊山路中口占

龍湫

實相夜

磨天臺

三首

御水臺

送婦弟李啓元

丁梅詩

臺啓請仍配

待命江郊二首

卽事

漫興

急雨

喝疾

天地

絕句

出江上

二首

舟行絕句

十首

昔年與

亡友鄭仲久曾于洗心齋

雨後泉漲尋其上

而玩之

塹城壇

山齋舊有老松

別洗心齋

與辛丈登松嶽

積石寺觀落照

謁鄭文翼墓

山居次淵

明歸田園
韻五首

偶題

觀漲

舟中漫吟

夕與啓元泛

舟伏波
樓下

左相李公

世白輓詞
三首

文谷遷葬輓詞

四首

曹溪

二首

九日

山房曉吟

病卧江舍呈水

明沈
丈

又和

二首

乍入城更次寄呈

述懷又次

又出江上次前韻

奉贐再從叔父

之任龍
潭五首

臨津用燕超齋中韻

滿月臺用簡易韻

櫪巖用翠軒韻

崧陽書院作

二首

華葳

送高萬秋

南行過蘆山

到社倉糧絕

艮谷感舊

八卦亭次板韻

黃湖

贈李邦華

作客

次軸中韻贈玄上人

奉贈李丈長句

夜吟

對菊記

西浦先生詠菊詩感賦

水閣

德雨諸人來

曉吟

卷之二 囚海錄詩

制除覽先君除服後詩感次六首

自東泉移寓山池二首

卽事

臨水偶吟

次先集韻二首

次先集韻

山池七歌

月夜望海

園中卽景二首

牧使送酒用東坡韻

載馬船

謫居感懷八首

對月次東坡步月韻

偶吟

久以惡風舟船阻絕

聞次兒病天用東坡哭子韻二首

悼朴休文詩

七夕不雨

久旱有雨次東坡韻

所寓泉石

林木之勝分爲十詠逸三

秋涼次前惡風韻

憶朴淵舊遊

述楞伽舊遊寄啓元

秋夜

無睡漫吟

漫用前韻

醉後戲題

秋夕前

一日閱坡詩分韻爲十絕句

李主人餽以祭餘

中秋無月

十六夜對月

對月次蘇氏韻寄仲施

雞犬

失馬

聞金吾郎

爲拿我來
到北岸

被拿候風感吟

誣告者承欸

吾得仍
配五首

資糧旣盡

於患難乞食
於白主人

患難

時高萬瞻等有古人風義感述

夜作

重陽不得

登高追賦三絕句

絕句

因病廢述作行

病起作詩

偶吟

秋興

八首

奉懷仲父

德山貶所十八韻

謫舍

濟州雜

詩用子美秦州韻二十首

望海

清風臺

深巷

秋盡

夢與述兒遊溪寺

雜吟

二首

謫中書事哀句成篇

詠濟州

二首

孤城

夜吟

夢問海

海答夢

哭趙正卿五十韻

寄高生允奎兄弟

有弟

小屋

次西浦先生

南海絕句
韻三首

盤龍硯歌贈任聖能

陸客李生

以詩存慰次
韻答之四首

大寒以雪

漫賦寄諸
弟二首

先君

諱日出浦邊拜哭
其明日作六絕句

除夕

五首

李華叔來宿對飲書懷

偶遊翠屏潭

移居南城

卷之

卷之

卷之

卷之

卷之

卷之

卷之

卷之

卷之

卷之

卷之

卷之

卷之

卷之

卷之

卷之

北軒居士集卷之一

初年錄

詩

全州

曠野蕭條過重城寂寞投青山
百濟國落日萬花樓浪跡歸遼
鶴殘生逐海鷗昔年遊覽地回
首意悠悠

淳昌

客裏旬初浹天南路苦悠水連
頭峙永山到赤城幽竹樹圍圍
密人家岸岸稠吾先大司諫磨
谷是松楸

康津

孤城吹角已斜陽駐馬金陵覺
路長天擁帆檣紛簇

簇雲吞島嶼極茫茫殘生作客家千里萬事傷心海
一方明發沙頭風色急鄉書和淚不成行

濟州

水拆三分國天排八字山驕驪盈野牧橘柚滿秋漚
杵唱聞朝暮商帆報往還獨憐滄海月流影照長安

次冲菴韻

棲暝城鴉夕嘶寒櫪馬風荒村臨水僻獨樹閉門空
萬慮孤燈裏長安片夢中蒼天如可問吾道豈終窮

久雨

海上冥冥雨脚垂一旬未有乍晴時雲騰窟宅蛟龍

怒風振林巢燕雀危愁向杯中那見滌病如甌裏苦
遭炊帆檣滯泊朝天館故國應嘆尺素遲

小晴

海天苦雨也新霽客子多憂聊細斟宴坐看山皆好
句出門臨水捻歸心黑雲漏日犬爭吠碧樹含風蟬
自吟正憶冠童携六七翠屏濕上一波襟

大靜道中

靜縣轉深入穹林無盡時徒然聞地籟那復覩天儀
颺颺千年老鳥鳶落日飢誰知滄海外更有太行危

次紫極宮感秋

海外亦秋色微涼動風竹明月自來去流光難可掬
何限志士淚秋懷非我獨愁憂苦無端中夜不能宿
故鄉幾千里歸期未可卜人事有盈虧物理亦往復
安得學長年桑海閱翻覆冉冉征途人誰見金丹熟

溪舍偶吟

世亂崎嶇命時平艱危蹤乾坤不知大山水肯相容
郊放誰憐馬泥蟠且學龍清溪霜後月許照此心胸

次鄭仲乂江都歌

有土不必澆觴醪有祠不必薦澗芷歌我江都歌一
曲用慰忠魂在泉裏嗚呼忠魂豈肯在泉裏應化長

箕掃蛇豕不然隻手一洗醒塵醜涸盡天上銀河水
魂兮元不在泉裏亦不必在摩尼山下甲申涖在天
日星地河嶽無處不在無時已魂兮安知區區建祠
與設祭只是敦樹風聲存人紀嗚呼江都之歌豈足
慰忠魂痛哭人間歲丙子

卽景次仲施和仲久

熏風習習拂長林古礎微微度夕陰池水頓清知雨
過禽聲偏悅覺山深向非絕境能忘世何得高齋號
洗心獨有靜觀無限趣孤居不願盍朋簪

自鎮海寺將赴月串未果

海寺已登覽月津須泝回未將輕鷁放却被老龍猜
白雨雷聲送青山暝色催題詩與僧別跨馬徑歸來

臨津感舊

我行適茲土十年如昨日歲暮江正凍依然亦時物
惟我西浦翁忠孝自天出丁卯筵中奏奇禍此機括
宣州經歲謫賜環賴聖哲而余此迎候喜見昔髭
髮寒天並雪馬風景增愉悅邇來十年事思之劇怵
怵孱孫仍世網路踏舊時轍雖云罪不明敢比冶長
綫茲當省愆尤倍深仰懿烈古渡悵夷猶重泉愴復
絕煙沙莽一色冰灘轉幽咽西日照我衣行邁何時

歇

夜坐次杜宿府韻

至後嚴風作夜寒客中愁緒對燈殘五更鄉夢依稀
覺數紙家書仔細看聖世固知無枉屈蒼天聊與
試艱難蟄龍深澤終須起宿鳥高枝只暫安

金陵雜詩次杜春日江村韻

一水通橋濶羣山擁郡深饑荒雖歲事薄惡自人心
客有閉門卧誰能携酒尋比隣相假借古道本無今
其二

山石覆簷碧村醪和粟紅直通西塞路近襲故都風

客况親僮僕生涯問主翁時危更感激砥柱在波中

其三

山氣戎戎霧庭陰漠漠苔江深聊可釣林密有餘材
風土從人慣襟懷底處開長程冠蓋續揔自日邊來

其四

今古應同致乾坤有賤生三言成罪戾一謫荷恩
榮雲雨當時見薰蕕後世名江潭歲云暮楚客易傷
情

開窗

開窗兀坐望寒空村落炊煙處處同暝色已生孤鳥

外歸雲猶在亂山中新愁聊欲待明月薄酒何能當
暮風正是殊方迎臘候故園梅竹自叢叢

曉起口占

倍覺寒生寢應知雪擁柴冬天猶曙色客子自愁懷
村罷迎神鼓官收備盜牌羣生方起動我坐若修齋
臘日用杜韻

嘉平纔返上元遙已見前山雪欲消客袂尚餘他日
淚梅花初動故園條却因佳節思鄉土徒祝豐年爲
聖朝正想 閼宮牲幣禮祠宮清曉下重霄

曾祖母諱辰

湖上松楸壠人間教育恩曾孫仍此謫已已更堪言
山曉淒風急庭虛白露繁年年哭今日今日倍傷魂
除夕以亂山殘雪夜爲韻逸三
丁丑爲戊寅陰陽所推敍乃在一夜中不容有把截
如是更幾度催我雙鬢雪大哉運化權人事良屑屑
亦知消長理天人未相絕

其二

村家衆婦子醺酒作除夜持杯邀遷客厚意不可捨
苦辭酒冷淡我言如甘蔗飲多輒成醉醉眠槽床下
春風漢江水向我夢中瀉

煮艾

啼鳥忽催興幽人亦出門携朋坐磐石煮艾佐清樽
野樹多煙氣春山有雪痕登臨猶局促未敢信乾坤

夜吟次韻

擁衾無睡點燈頻料峭餘寒尚恹春只爲未成鄉夢
去徒然添得客愁新古人可作當誰友明主寬恩
有此身枕上憧憧交百慮却疑排遣語非真

雨中用簡易韻

春霖挾瘴報晴遲更耐陰風拍拍吹未害連宵喧客
枕祇應不日見花枝夢驚東洛猶浮謗恩許西川有

好詩草木羣生同惠化
明時雖負却芳時

星河

星河倏曙色禽鳥自春聲
寂寂避人境悠悠看物情
經年猶旅泊萬事仰君明
極目傷千里乾坤屬發
生

圓明寺

聰印論詩久康翎乞食纔
我行還落莫西望更徘徊
谷邃風泉響松陰雨色來
不知何寺夢飛到此樓臺

朴淵

朴淵目擊勝前聞
奇處須將氣勢論
震薄雷霆渾竟

日騰凌甲馬自千羣臨流恐失傾危足出洞應招辟
易魂不測潭中龍抱子更愁咫尺作風雲

其二

用文谷韻

朴淵從古幾人來挹翠東臯松下埃如此風光獨我
賞若爲懷抱逢君開千層絕壁叅天起百道飛泉湊
壑回且把高文爭勝槩神交本不限泉臺

自雲興寺登城上

薄暮雲興寺晴朝小朴淵平生幾魂夢造次卽神仙
歷歷龍吟處戔戔鳥度邊築城應遠略吾且賞風煙
遊圓通庵

未盡朴淵興圓通庵裏來窈深疑地底軒豁忽天隈
雨氣侵槐檻泉光動石臺靜中聞爽籟還勝瀑喧逐

新秋

閉戶涔涔病未蘇秋風忽已動郊墟百年渾送憂愁
際四序今逢蕭瑟初日落魚龍深窟宅天高鴻鴈滯
音書江潭極目猶堪賦懶惰無心出樊廬

其二

兀坐支頤送夕暉天時人事共依依二年楚澤吾猶
放一夜秋風燕欲歸志士本期當世用窮途其奈素
心違柳州乞巧亦何意且任北方多是非

猪灘

一水迴羣麓平山在近湄板橋臨宛轉沙步進逶迤
落木清霜後斜陽遠眺時豐川朴太守白刃事堪悲
漫吟以悲哉秋氣蕭瑟爲韻

四序自平分秋獨有何悲胡然志士淚千古不勝垂
短日應可惜功名須及期孔孟亦遑遑孰能忘救時
時命有相乖居然歎吾衰更憐楚澤畔有客吟江蘺
芳華坐零落美人猶可思

其二

盜蹠以壽終善人遇禍灾蒼蒼本無知報施何有哉

史遷不早覺懷古謾悲哀桎梏有奔趨文綉亦徘徊
榮枯自外至忽若風中埃百世有君子是非當取裁
但恐青史說錯雜亦難該

其三

我無名利心於世更何求每觀觸罪者多因一身謀
奈何不蠹木震風由外投汗漫復恍惚欲省莫適尤
無乃愚且頑有惡不知羞棄置勿復言言之知者疇
會應知心友相期在千秋

其四

我身未涉世頗能知世味鴆毒與荼苦備嘗在腸胃

飲酒聊洗滌沈冥非所貴古人
事有甚持比以自慰此亦強
排遣達道則猶未鄒儒不動
心由有浩然氣區區一朝患
何足爲深悵

其五

秋天已漠漠秋日轉蕭蕭寒
蟄依草根木葉黃以飄我時
坐空齋感物思難聊一讀宋
玉詞朱顏欲爲凋運化固無
停有盈則有消忽忽石火頃
達人足逍遙自其變者觀萬
古亦一朝

其六

杜門了無見未覺日月疾忽
爾門前山青蒼變蕭瑟

嚴霜凡幾夜秋事信卒卒綽約數枝菊孤芳誰復恤
慙慙陶元亮歲暮勞采擷人去物獨存襟懷無與匹
放逐餐落英焉知非隱逸

申大將

汝哲
輓詞代製

烈烈琴臺帥弓箕與後看大星尊北極喬木蔭東韓
宿望今誰並完名古亦難向來三十載邦國重如
磐

其二

聖主回乾斷元戎半夜趨橐中千載會肘後四營符
屹屹鰲撐柱堂堂虎負嵎吹沙餘蜮在妖亂更膏鈇

其三

輔國中兵重無多見武臣太醫持御劑哀賻降

恩綸廊廟升平象干戈朽鈍辰居然良將失若慰彩眉顰

其四

昔我趨戎幕公追息老蹤旌旗動光彩禮數荷優容
慘愴驚樑折蒼茫向斧封西門僑舍淚未醉已霑胸

谷雲輓詞代製

蕭條岳麓里十載忍追思世已重陰積天猶一老遺
谷雲敦夙尚梅月托深期遲暮紆金紫清明際此時

其二

天與高標獨家承正氣餘襟懷元亮賦游戲蔡邕書
水石供清賞縑緗伴燕居至人終不病來去揔脩如

新秋

積雨初收秋又生今宵月色十分明露溥碧樹幾時
好更靜陰虫空自鳴未信金門容曼倩任教塵世棄
君平男兒何限不稱意詞賦年來無楚聲

李判書

世華輓詞

代製

海域曾長夜公如皎日開綱常終不墜鼎鑊豈爲灾
魯國靈光在義經泰運來老松焚斫後仍作棟樑材

其二

聖后真遊日追陪有老臣衆誰無母子公不愧天人
氣已歸河嶽神應翳鳳麟他時盼饗所知在魯湖濱

又

聖母登遐公便隨老臣誠惘上蒼知回看鬼蜮咸鈇
鉞翟馭前頭奏賀辭

辛巳十一月二十五日向扶安配所到露梁作
五載再嚴譴西南任轉蓬敢言曾母惑自是阮途窮
浩蕩風舟急微冥水岸空六臣祠廟在悽惻暮煙中

別蘆山

晨星耿在天馬嘶當去路我行未敢遲我懷欲誰訴
豈能禁雙淚再拜辭祖墓皇皇無所見積雪封枯樹
傍巖旣踟躕出谷重回顧十年紛遭罹九原增悲慕

其二

是身處宇內豈免謗騰喧惡名無不有放逐那可論
久知關運命亦欲謝囂煩蘆山丘墓處晚計吾所敦
問舍大栗里買粟安陽屯造物應竊笑世故如雲翻

其三

烹魚又蒸栗濁醪携陶器諸宋與趙崔送我爭來至
苦言離別難敢望後期易我困重人情隣里况厚意

嚴程旣少畱爲爾成一醉憶昨共觀稼在野多好事
茲鄉頗淳朴衆人惟名利

公山

遠別雙親在窮愁萬事非風煙湖外濶徒旅雪中稀
歷野江初動投村樹共依明晨復南指回首片雲飛
其二

渺渺將遵海依依在半途夢猶京國怯飢任僕夫呼
鄭牧頻書札林家具酒壺羞顏向親故清代獨崎嶇
栗浦

栗浦路出益山西清晨策馬到午雞岸上人家編白

北軒集

竹鹵中草木霾黃泥已任風高波浪怒况乃日落川
原迷篙師謂我且少憇豈有故人在金堤我今畏法
敢圖便忍飢登舟神慘悽弱妻在前稚子後天寒路
險相扶携汝曹何辜又棲棲

發金堤

朝霞散空林霽日動羣巒深冬更佳景南國無嚴寒
野望淨一色遠竹時數竿雲端城郭生隱隱見扶安
久行筋力疲未堪道路難我馬歷冰雪亦應思卸鞍
恩深得配近分定使心寬不暇問風土如就故里懽

到配作十韻

重湖仍右界沿海有茲方漠漠陂田徧登登縣郭長
謫居隨所遇隣舍得相將螻蟻惟存命黿鼉與作鄉
時清知罪戾地僻喜風光岳色煙濤內樓陰竹嶼傍
物情聊應接仙賞本微茫發興時文墨謀生且稻粱
黃圖標斗柄玉燭照春陽別後吾園裏寒梅幾樹香
弟雲從卽歸

有弟隨千里將歸慰兩親亦知畱不得更覺別如新
湖海孰非土乾坤猶着身沙頭鴻鴈影風急隔東津
漫吟

至後行鞍稅臘初扶安縣裏定吾居却看海岳雲煙

別未怪鄉關信息疎
生理魚鹽交絕島
土風巫覡走荒墟
樊裘已盡衝霜雪
南紀寒輕柳欲舒

夜懷

風吹雲雪散空城
獨夜高齋夢數驚
倚杖星文瞻大角
閔樽節序餞嘉平
梅花已動南枝色
鴻鴈能無北地情
自古何人免羈旅
不須惆悵到河傾

北風

北風蕭蕭吹遊子
憂多夜長坐還起
城邊野鴉棲數羣
鴉亦隨人啼未已
南州炎瘴風更寒
漢京臘月知何似
隣家張燈置酒樂
父子兄弟一室裏
我獨胡爲

遠離別夢魂長尋嘉會里

其二

北風淅淅吹邊山層冰積雪山谷間惡虎養子處其
內高林叅天不可攀此鄉之人最貴薪人馬入山或
無還小僮日暮形影絕令我悵望憑柴關病妻稚兒
埃須煖汝奴何得辭辛艱

十二月二十二日

哀哉我仲母此日葬蘆山期服天邊在魂車雪裏還
尚思投急劑纔得訣生顏沙浦通清漢憑添血淚潛
除夜

常時任除夜今夕意無窮故國星辰北孤城瘴癘中
客衣猶別淚雪樹又春風愁寂妨迎送難教酒盞空

鄭生鎮河見訪

松老仰如斗星山曾卧雲有孫能話舊爲客免離羣
海濶風恒急春陰日易曛柴荆長自掩剝啄乃今聞

新春

客日知無幾王春忽見隨普天承雨露殊俗雜蛟螭
郭外涓流動墻根細綠滋微軀惟藥物那得免低垂

其二

曉頭題詩罷如將再立春苦吟非素樸羣物要陶句

倏變海山色兼催梅柳新壯夫今有恨遇興亦霑巾

其三

終日風扉響還疑信使來神傷動灰管跡遠望鄉臺
起滅看山翠陰晴驗砌苔朝廷問府主杜老亦勞哉
鄭生仲父之子也爲長句以贈

憶昨汝翁逢沁府向我自言松江祖兩家累葉講弟
兄翁卽忘年我爲伍府中共就洗心齋一月酣歌露
肺腑賦詩寧孤碧海春遊騎或濕青山雨人生萍水
且爲樂我愛汝翁心貌古皇天老眼遺善人短褐不
完終草莽百篇空輸篋裏塵一杯誰澆墳上土我是

畸人困多口逝者可嗟生亦苦扶安今日汝忽來驚
喜如對翁眉宇呼燈促觴說往事久客心弱萬感聚
盛世臺閣有公論此謫何能比湘浦羈窮已絕朋友
問釁戾且懼神明怒向非金蘭百年誼星山幾如隔
玄圃爲汝更吟將進酒孤城寂寂山月吐丈夫失意
寧自恨遲暮生涯足漁戶汝有高才必登敷汝有老
母憂貧窶更願讀書仍飭身如汝何難繩祖武

出步所居門外

鄙人伏積正沈纏散策籬前爲興牽長日困窮殊未
已有時開暢亦蕭然春光自到無花樹海氣渾如欲

雨天漢水南山愁眼外不堪流落見新年

早春

早春正月滯扶寧日日愁連長短亭南雪已消宜眺
望北書時到慰飄零山門雨送龍湫黑邑市風傳蜩
島腥無奈人生同物化鏡中非復舊顏形

登向巢嶺

巢嶺岩嶢上處微春晴海濶見帆歸漁村捻指青煙
抹鎮堡遙分白鳥飛便欲乘槎身尚絆祇能作賦興
無違謫來天與飽形勝未信人間吾道非

其二

病起出門愁遠天兒扶得上最高巔金堤萬頃入足
底華岳三峰疑眼前巢鶴引羣仍止宿渚鴻將子共
畱連登臨自切鄉關思况送煙波北去船

其三

長嘯登茲嶺茫茫俯海門羣山渾似島一縣欲無坤
紫蘚封危磴蒼杉護僻村眼中森鉅細高興卽飛翻
絕句

閒憑竹架親書帙獨掩柴扉斷客蹤兒子能吟宗武
句孺人不憚孟光春

其二

向巢嶺下流人宅注乙津頭賈客船野鴨入羅能佐
酒海魚盈尺始論錢

寄金生得孫

水舍雖他郡蘆橋豈遠湄天邊惟爾在春後與吾期
鳥下高齋靜花明散帙宜
有來同此樂曾恐外人知

奉贈水村金丈

丈人名家孫胡爲老草中由來力耒耜未必逢年豐
曾隨文谷相每語蘇堤翁能爲二賢賞安可厭困窮
觀乎夸毗子趨舍何忽忽
良秉論議名利或相蒙
惡臭與好色未若君由衷不求何不臧聖人言豈空

舊識今傍縣豁達慰飄蓬野梁漲春水馬陷啼小僮
襪濕對我笑二兒亦來同聲氣有相從屈伸惟天公
重君辛勤意短語叙始終

楚山詩送德叟

我心鬱悵思楚山山高可望不可攀夢見麒麟嚙芝
草日月照耀雲煙間霓旌羽蓋風爲馭仙樂噲吟來
山間魯國壇前引三千紫陽居右參周旋不然赤舄
趨黃驪玉欄看花同御筵萬邑鑿井皆得泉楚山
况經龍蛇年二妃叫舜屈沉湘千古一名寧偶然南
山長松北山石棟宇應如山不騫衿紳濟濟傾湖嶺

兩丁俎豆誠益虔溪上孱孫感淵源十四年間餘淚
痕未論縲紲身難動汚跡何宜登廟門送君將事贈
君言衛風淇澳詠不諼

羅州鄭生運衡屬余辛未省行相遇於海南今
又來候借馬中途遣還間關以就羈窮不能無
語

風帆曾赴海驛館暫論詩徒步看無恙浮生乃有斯
錦城煙樹濶棠岳暮潮悲艱險由來久君休怪髮絲
邑宰送酒

年豐纔糲飯俗薄闕香醪對月如相弔吟詩未敢高

深情蒙地主盡力遣離騷使者春泥滑憑軒愧爾勞
雨

漠漠湖南雨隨春到客中柴荆霑向夕枕席冷兼風
農事催應急家書阻不通故園新物色歸夢繞花叢
其二

留滯疲酬應陰晴自一天山雲凝未動海雨密相連
鳥雀依籬葉兒童決石泉直愁聲徹夜肺病久無眠
贈鄭友直

詩人誦干城魯論善知方將帥何代無忠義有不常
錦南起側微簡策爲生光單騎問行在穎脫人莫當

紛紛食君人遇難多退葢 至尊召與語諸公嗟嘆
長金墉旣幽辱妖孽潛礪鉉捐軀誓同志事已志則
彰彝倫方墜地烈氣橫秋霜畢竟鞍山勲樹立何煒
煌使微公一奮八馬豈漢陽力遏島中亂齊魯免戰
場炳然尊周心狂賊敢借航詩書蔚爲本韜略自有
綱千古不數見百年誰相望紀績歸吾祖易名請朝
章稚昧奉筆硯事行頗得詳魂夢每光山豈獨爲吾
鄉謫居閉門坐有客登我堂自稱元帥孫鬚髮亦已
蒼逢渠話往昔感懷增激昂南驕轉可憂西怨終難
忘楚劒久不利所憂城復隍安得如公輩築壇近巖

廊豈令有識士中宵暗涕滂賢豪子孫飢自古足悲傷誰囑秉銓宰汝今趨路傍

次韻答嚴義吉

義吉賤類也不就戶曹吏而甘書寫曰是足無飢也少能詩今年七十猶用功於敲推舊以所著質于吾祖父手評宛然袖以示余可感也去年印吾祖父遺集開役勲府義吉實從余弟兄與諸客而相焉校讐暇見其白髮朗詠輒稱嚴老而敬之余之出城亟來泣送今勤勤致書並詩蓋其志尚不專詩而已

雲臺往事夢無緣
嚴老詩來恨各天
閭巷何人如汝
靜衣冠一代莫
吾憐城南白雪
曾分手海上青
楓忽改年千斛
羈愁同賦米春
風載送漢江船

夜吟

夜宿香爐殿相依
白衲禪松篁涼客
枕星月淡春天
梵響時時徹燈
花箇箇圓頭邊
金粟坐魂夢入
重玄

送人還京

二月東津春水生
孤舟明發喜風輕
如何一作湖南
客長送歸人向
洛城

風不止

曠野東風吹未回浮雲多在禹金臺鄰家耒耜春將
舉逐客門扉晝不開

出遊城隅作

緩步登殘郭長吟俯一陂爐煙隨坐得棊局見人爲
竹影清波動山光麗日移湖南春可賞客意易成悲
康津尹生來見草贈生自耽羅時已相厚

萬德漢挈北扶安湖界中舊遊千橘熟相憶一潮通
汝輩唯吾與年來屢此窮京師似天上誰憫獨書空
金友兌孫自扶江來於其歸書贈

何必來相問吾形亦已凋爲身長汚辱有跡但飄飄

極浦黔毛近清江白馬遙歸應報親故生理且漁樵
喜雨得霽字

南國春方旱狂風日益悽今朝看好事小雨入新題
香動畦蔬嫩青浮壠麥齊流氓惟飲啄應免瘦妻啼
送德叟歸

十日對君懷盡開長鬚奴子韝驂來逢春滯遠堪千
恨餞客傷貧只一杯莽莽海山分袂內依依花柳斷
橋隈近聞聖主親多士轉向京都莫浪迴

夕望

躡履步中庭回望青山郭寒風起疎松暮色隨羣雀

閭閻凡幾家煙火婦子樂羈人適有興詠罷還蕭索
贈羅生星奎

袖裏尊公札兼携買粟錢殘生還此地高義自當年
夜雨荒村榻春風古渡船相逢仍悵別况指漢陽天
殊方

一卧殊方嘆逝年此身何敢問高天千村花發逢寒
食萬壑潮生過上弦民俗相親聊笑語風光難負強
詩篇夢迷銅雀津南北諸弟誰登蘆谷阡

田氏園作

騎馬出東門行至田家村村疎粧花柳未聞雞犬喧

捨鞍得徐步堂外無墻垣主人見之忻共就家後園
竹生徑左右爽氣奪春暄逶迤升漸高衆山旁騰騫
指點半天青石佛勢彌尊遠望浦溆湊近對田疇繁
追來兩三客小兒亦樂奔設席占陽坡煮糕置清樽
香糜我則具酒價客與論主稱情禮缺膾魚霑盤殮
今年粟米賤亦有網罟存蕭然林表事澹爾丘中言
旣喜茲地勝重感子意敦我非貴口實且滌心憂煩
世路如山險人情逐雲翻他鄉有若等四海本弟昆
高家村望海

移席臨沙岸披襟遡海風潮聲疑帝樂日色近龍宮

歷歷孤舟送悠悠數客同白鷗飛且止何似在籠中

遊邊山路中口占

日送楞伽目餘春俶此裝回頭失城郭信馬得陂塘
樹密鶯兒喜泥暄燕子忙所過疲領略惟覺近青蒼

龍湫

百丈清潭孰敢渾天教神物此蜿蜒扶安萬古多雲
雨渠亦深居養子孫

實相夜

幾夜招提宿吾身亦類禪人間多幻妄象外有因緣
紫閣隣山鬼青燈近杜鵑更深不成夢燕坐獨超然

磨天臺

三十男兒懷不平磨天臺上俯滄溟騰身已入半空
去極目唯看孤嶼橫要與煙霞敦宿契畏教鷗鷺笑
羈形酒酣高詠壯遊句風動浪翻魑魅驚

其二

山勢近從興德入海程遙與濟州通龍飛鳳舞真非
偶鼉作鯨吞浩不窮絕岸潮侵千頃白危巖日蕩萬
層紅茫茫人代微塵外滾滾天機瀨氣中

其三

得到茲臺亦何好一生襟抱略堪憑吸風仙子應吾

待貫月靈槎果孰乘北極天樞魂久斷南州地角病
相仍名山到處仗嘉惠更憶前年遊大興

御水臺

御水臺前日欲西新羅無跡草萋萋山雲千載誰成
夢蜀魄殘春一任啼

送婦弟李啓元

天雨正如此汝行猶不遲飛花騎馬處宿鴈喚舟時
男女情何間翁姑意可知好歸傳好在惟有夢中期

丁梅詩

古稱文章一小技丹青於文又難比人才各隨風氣

變世運盛衰觀諸此南宮衆史徒竊廩丁梅筆下長
風起戲將水墨寫山水往時虛舟難擅美尤工睡鴈
逼造化慘愴蘆花月明裏忽然移來湘岸秋寶瑟無
聲頻側耳二十年來聲名振但道人間少知己伊昔
湖南幕中趨主將愛才恩獨殊散帙投壺日多暇丁
梅盤礴在座隅前後揮灑百千本主將每嘆時所無
煌煌禁衛授鉞地韎首鞞袴列虎貔遐方之人此周
旋出幽遷喬在斯須自言薄技蒙大惠感激何啻雙
明珠主將欲令梅乘障願畱門庭應傳呼萬事反覆
紛所閱一身飄淪况堪說河濱碧血久坡陀白馬寒

波暗嗚咽至今夢想當年事淚眼盡枯肝膽裂飢寒
未得活妻子潦倒偏能耽麴蘖人當困阨藝益進醉
墨淋漓更奇絕強爲鄉豪成人帖俗眼何能知妙法
我來扶安忽逢梅相對話舊悲懷集白團淡抹爲我
就累日慇懃求我什我縱言之孰能賞亦如汝畫難
偶合請看貂帽許王簿梅乎梅乎嗟何及

臺啓請仍配待命江郊

法府初伸枉霜臺更用威乾坤非不廣歧路欲何歸
芳樹圍山徑清江對野扉須臾聊偃息身世兩依依

六月龍山舍淹畱枕簟清風江流更急雲日漏還明
放逐終何限憂愁抵半生漁翁乘小艇應覺世緣輕
卽事

高閣乘幽興清樽向遠天朱明開檻外白雨捲簾邊
一隊魚蝦市千帆貢賦船炊煙隨處起人語各喧然

漫興

客懷蕭瑟夏如秋徙倚江亭數去舟庭畔紫藤行處
遍葉間朱杏摘餘畱朝廷就我伸清議海岳由天了
勝遊有夢只應徵化蝶無心且可學隨鷗

急雨

江畔急風掀小亭飛虹乍滅雨冥冥未論落景穿雲
黑併失羣山隔岸青簟席生涼霑更徧紙窗受破灑
無停三農自此得豐熟病客敢愁終夜聽

喝疾

喝疾兼臺議幽居賴聖朝開窗何郡岳隱几一江
潮雨岸鳬身淨風檣燕影搖殘魂猶嶺海端欲待誰
招

天地

天地寬容物江湖迴卜居一年三伏始雙鬢十生餘
無事監園菓從人問市魚長風期破浪濩落更何如

絕句

窮愁幾日掩江扉
村酒三杯無是非
米賤應緣舟泊近
草荒方識客來稀

出江上

男兒三十非老矣
皮肉空存心半死
長安十日何所得
姓名又入臺章裏
旣未能高飛遠走
絕羣類無身方可
了此事出門尚覺
乾坤大不敢遽灑
楊朱淚龍山亭子
莽翠微大雨三旬
江水肥白鷗之盟
其庶幾

其二

長江浪頭高接天
江上小亭如小船
蛟龍出沒軒窗

前主人蹤跡本無住便可於此乘槎去乘槎也亦非
吾宜聊與隣翁理釣絲翁不聞磻溪桐江異出處我
輩得魚充朝飢

舟行絕句

龍山亭子別畱篇背後終南更黯然豈有扁舟忤臺
閣百年江海且隨緣

其二

麻浦西江皆已過仙遊峰影蘸清波其間亭榭半荒
廢自是京華冠蓋多

其三

掛席長風生自東不妨疎雨滴孤篷青山但信來迎
我焉記篙師半日功

其四

風光頓別楊花渡久識蠶頭天下奇挹翠英魂應不
泯一杯招和百篇詩

其五

兩岸諸山捻可刪孔巖獨立亂波間亭亭不受蛟龍
蹴唯許蒼苔萬古斑

其六

杏湖未到但曾聞金朴高亭可置樽篷底醉眠容易

度望中大抵樹煙痕

其七

急雨回風船却退落帆浦口住移時耽羅九歿今追憶敢道西江波浪危

其八

蒼蒼岸木浮還沒白白洲禽去又來雲影幾隨檣影轉雨聲時和櫓聲催

其九

終朝已覺舟行遠大雨仍看水勢高鴨島以東無草樹蟹灘之下足風濤

其十

羣山如障水成湖歷歷漁村隔岸紆聽得舟人笑相
語祖江十里是江都

昔年與亡友鄭仲乂會于洗心齋蓋累月矣今
來不能無感

鷓鴣詩不作草沒廣陵墳意氣由來合幽明乂已分
亭尋歸後跡海有別時雲嘗愛池邊酌如今恐獨醺
雨後泉漲尋其上而玩之

山齋有霖瀑散步遂窮源一逕纔通石羣松與闢門
興來惟赤脚日暮且清樽萬水朝宗意何曾鉅細論

塹城壇

欲問堯時檀木君摩尼舊跡塹城存
長畱明月曾看築縱有蒼藤未易捫
歷歷羣山歸聚蟻茫茫積水了騰鯤
冀州三等階蕪沒風雨東天鬼護煩

山齋舊有老松枯歿者今來亡矣爲賦長句

憶昔洗心齋西一株松有幹無枝但穹崇
生前旣能傲霜雪歿後不失如虬龍
故老莫知其年代只言催折兵戈中
光山子見而憐之日日哦詩對禿翁
烏啄殘皮破青苔蟻穿亂穴來
寒風謾說千年產靈藥况望萬牛煩
良工欲邀子綦共隱几淵明且携無絃桐

憐渠猶有倔強意任道如堪憔悴容蒼天變化不可
測豈或蜜葉生叢叢十載誰看玄都花千里空傷楚
江楓本期鶴返遼城是不料舟移夜壑空山齋豈憂
乏薪櫬可惜無人念角弓犧樽青黃尚云灾火傳人
間嗟汝窮早知萬物皆如此徒然感憤嗔衙僮光山
子一生喜壯遊城邊水與銀河通嗚呼世與我違今
身無所適忽失孤槎今焉得造天宮

別洗心齋

明發東歸客高齋得復淹柳風虛度砌池日迴翻簷
漫爾新篇在依然別恨添秋山當馬首蕭瑟意俱兼

與辛丈登松嶽諸冠童從焉

松嶽遊人四五同晚來登眺思無窮
三都地勢皆歸海八月秋光正屬楓
村似蚌螺黏遠近帆隨鳬鴈列
虛空名區更約重陽會客鬢還愁落帽風

積石寺後臺觀落照

臺臨海日特嵯峨就見虞淵未必多
不是九烏堯命射徒聞三舍魯揮戈
紅雲簇簇猶扶護碧浪滔滔已蕩摩
俄頃半邊銜得盡山河萬國奈昏何

謁鄭文翼墓

相國遺堂斧巍哉不可隳山秋紅葉爛
石古綠苔滋

半夜滔天禍孤忠轉日時巨川須作楫平代亦公思

山居次淵明歸田園韻

少壯志四方衰暮戀故山我髮今尚黑懍懍且中年
流離得天幸有如魚返淵樂哉就郊居何況買墓田
餘生倘自由亦足老此間朝吟茂林下夕憩蒼巖前
忘情任魚鳥閱目唯雲煙內守存澹泊外營舍狂顛
役役征途人應復羨吾閒先靈庶垂佑此樂可必然

其二

洪流少安舟峻坂無停鞅彼以天下急焉暇丘中想
伊余嬰罪錮欲進不能往所以門前徑蓬蒿隨日長

終非隱遯賢我心寧自廣湘潭與商嶺千古同蒼莽

其三

日暮炊煙起墟落見人稀屋後有新樵老奴亦已歸
食訖登西園清風爲吹衣卽此聊偃仰未覺心計違

其四

南隣數三子迭來相與娛我方步庭除子已歷壠墟
悠然共一笑亦不問起居春來蠶欲生子有桑幾株
雨多土脉融播種復何如答云免凍餓自外不求餘
人生有定分子言良非虛身閒且爲樂濁醪安可無

其五

濁醪雖忘憂旣醒亂心曲不如一床書生計此中足
千秋洞冥觀一事尚吾屬世界爲長夜聖賢如燈燭
勿爲浪自歎優游度暝旭

偶題

日午郊扉靜山禽在枕邊幽懷誰與嘯懶性只堪眠
雨長蘇門樹春開月谷田民生各努力吾亦有吾天

觀漲

積雨蕤賓月平郊散百川旁臨無遠岸獨立向高天
門巷蛟螭側帆檣樹木顛南華稱達識河海較何偏

舟中謾吟

江海身堪寄陰晴興若何捲蓬山色近搖櫂浪花多
賈客同開飯棲禽互答歌誰能怨漂泊自昔任蹉跎
夕與啓元等乘興而出泛舟伏波樓下用翠軒

韻

但怪城樓時出沒豈知雲月乍陰明尋常櫓外輕鷗
集恍惚筵前巨鱷橫漁戶屢經分火影漕船相近共
潮聲風光只是遊人管乘興隨波不問程

左相李公

世白

輓詞

代製

六載仍台府明良際會隆太陽終不滓喬嶽自多功
水旱頻焦念凶嘉備瘁躬從人祈釋位臨沒又謙冲

其二

未易兼才德如公合廟廊疲氓賴蘇息吉士共登揚
世仰貧文子 恩加病柳莊誰論七十壽竹帛自無
疆

其三

膠漆同朝舊滄桑晚節看殘生誰倚仗卽事尚艱難
荒壠非閑閤哀歌異噉齏無由去臨葬巷哭與悲酸

文谷遷葬輓詞

代製

殷仁餘教自東韓文正家聲特可觀只爲三綱如揭
日仍將隻手欲廻瀾風霜月嶽行吟苦松栢 崇陵

望眼寒章蔡幾時還馬呂九年當軸國猶安

其二

維楊閒却舊田園韋布初心上相尊芝草鳳凰宜瑞
世和風甘雨與調元微陰躋躅知無奈洪水橫流可
忍言前席雍容魏晚節斯文一脉賴公存

其三

此身終始任倫彝無怪龍蛇有百罹久喜栗思賢輩
出奄看冲靜禍相隨滄波流恨堪千古白日迴光又
一時夢裏風雲重感會士林揮淚誦宸辭

其四

人亡尚謂典刑餘閱盡滄桑世界虛漢代三君彌可
仰秦家五穀果誰如玉溪故宅猶沙道金谷新阡更
柳車四十年間床下客非因私哭也霑裾

曹溪

蕭寺燈前客空山霽後天樓臺危石角星月亂林顛
百慮知何在孤吟亦偶然瓶醪隔城市不怕醉逃禪
其二

客有悲秋意禪房且靜居老逾耽水石窮不廢詩書
谷雨陰藤密巖霜晚菊疎天機與人事更莫問何如
九日

窮愁更被逢秋劇勝地誰能命駕尋但以孤吟酬令
節且將嘉菊侑清斟寒溪石瘦丹楓落古剎壇空碧
蘚侵吹帽龍山豪興在只今疲薶怯登臨

山房曉吟

輟讀開窻向遠空殘燈落月共朦朧山川滿目渾冰
雪敢信微陽在地中

病卧江舍有吟呈水明沈丈

漢柱

求教

郭外無人懷共舒聊從沈丈問何如神仙自是樓居
好翊衛元來禁直疎想有垂楊堪繫馬誰憑曲檻與
觀魚未衰已抱幽憂疾春滿江湖不出廬

又和

閒來四體得安舒
日夕江臯興杳如
已與時違忘出處
自從交絕等親疎
草煙冪渚眠鷗鳥
花雨添波養鰕魚
領取風光無限勝
癯儒不用歎窮廬

其二卽事

昨夜山雲欺望舒
今朝江雨亂絲如
不妨洲鷺輕毛濕
應爲園桃嫩葉疎
僮僕能沽倉市酒
帆船看載海州魚
莫嫌十里城塵近
車馬聲無到我廬

乍入城無聊更次寄呈

三月陰晴交慘舒
杜門涔寂類曇如
病來藥裹唯堪

近閒處書編却未疎長向人間憂市虎不須秋後憶
吳魚任教紫陌多遊騎花發清江有草廬

述懷又次

詩功未足策娛舒須識銷愁酒莫如屈子休論時溷
濁嵇康元自性麤疎朝陽久不聞鳴鳳江水何曾救
涸魚歌罷一杯殊妙理古來行樂在田廬

又出江上次前韻却寄

峻良乘運大鋪舒清代窮愁孰我如春引長江圍砌
曲夕邀孤月透窻疎任他翻手生衣狗猶欲眇眸辨
魯魚更覺無私天地在花開鶯喚散人廬

奉贐再從叔父之任龍潭

行年五十斗如城窮達悠悠豈足驚去矣無他言可
勗絃歌故是我家聲

其二

溪山深邃最全湖松桂清陰滿邑居興到何妨靈運
屐閒中正好退之書

其三

崖蜜松花五味子人參辛菜茯苓俱荒年可以充飢
腹久病仍看黑白鬚

其四

陶令高風千載事
卜良新畫作行裝
此身舒卷閒雲在
彭澤柴桑可兩忘

其五

殘生携笈老山房
兩目眇昏意更長
燭蠟休論千里遠
免教匡鼎借隣光

臨津用燕超齋中韻

落日山如染
微風浪作花
偶來尋古渡
渾欲着吾家
歷歷鴻遵渚
輕輕鷺聚沙
汝曹閒自在
捨棹一長嗟
滿月臺用簡易韻

麗代繁華地
遊人寂寞迴
山河餘霸跡
荊棘自高臺

氣數雖云爾，彝倫有是哉。
旋師我聖祖，鴨水肯遲徊。

櫪巖用翠軒韻

滿月臺荒只暫臨，櫪巖清絕且來尋。
當年幾度鑿輿幸，落日唯聽牧豎吟。
流水自將無限意，亂山空作幾層陰。
昏淫從古期淪喪，只爲賢豪費愴心。

崧陽書院作

白日三韓國，青山數畝宮。
春花空自發，逝水欲何窮。
固有周王聖，其如畫邑忠。
黃冠不相貸，吾敢恨諸公。

其二

畫師那得寫精神
紺服烏巾但此身
何不开模橋上
事千秋深戒二心人

華藏

空山月黑雨淒淒
佛榻蕭然客暫棲
知有麗王遺像在
子規終夜不勝啼

送高萬秋

耽羅此去二千程
一半滔滔泛大瀛
爾自歸家心不
樂我曾爲客夢猶驚
朱明冰雪恒迷嶽
薄暮鯨鯢亂拍城
絕域僅存耕牧業
那能無羨上庠生

南行過蘆山

秋霽蘆山夕停驂試一臨孤巖風澗落四野候虫吟
天地容浮跡光陰負壯心明晨更南北回首此雲林
到社倉里糧絕居民方亦飢矣饋我以棗實
晚憇空江上依倉僅數家傾囊愁倦僕撲棗亂棲鴉
我道應如此民生重可嗟年年減租稅 聖德復何
加

艮谷感舊

艮谷溪邊宅重來歲十周捲簾殘月曉憑檻大萸秋
萬事已陳跡孤兒今白頭龍門書有癖倘復見風流
八卦亭次板韻

端由杖屨所山水豈專佳時義曾嘉遜淵源自敬齋
閒雲棲古壁密竹護空堦慚昧先天奧登臨願且諧

黃湖

閒來命駕此幽尋八卦亭空且獨臨地坼黃湖雲漠
漠天低蒼壁晝陰陰松篁各保千年色舟楫俱含萬
里心勝絕武夷遙可並櫂歌今日亦遺音

贈李邦華

不謂爾如此棲棲何所求居然江海興兼以稻粱謀
落日誰優孟悲風莽杜郵相逢秋欲暮霜氣薄吳鉤
作客

作客黃山曲閣樽白露前心肝憑舊識顏髮向流年
塞鴈鳴何切湖雲晚更妍浩歌終此夕吾意在蹁躑
次軸中韻贈湖南玄上人玄於吾扶安時已相
聞今忽遇於曹溪休靜卽其遠祖云

甌錫無南北浮雲不繫天憶曾吾在謫恨莫汝論禪
萬水龍俱寂三更月獨圓西山大師後妙法倘遙傳
奉贈李丈長句

四隱老人誰敢如行年八十猶看書所恨不見大明
再聞道尚有尤翁餘逢時何限丹其轂老人窮巷出
無驢祇今漂泊寓山房糲飯不給唯荒蔬故交零落

人事異遲暮襟期頗向余憶曾遣子來回瀾還同漁
父問三閤十載重逢兩驚喜肝膽依然齒髮疎懸燈
細論一太極傍有高僧證空虛從來儒釋道同異老
人分析繇其初世間膏火困衆生焉得渠家用三車
且休高吟匪風詩漫漫長夜陽誰舒不聞昔時宣尼
語吾黨小子須歸歟老人老矣我則窮努力唯應惜
居諸

夜吟

萬籟歸泐寂諸天入杳冥古龕棲土黑虛壁掛燈青
獨坐看僧睡孤吟與鬼聽此心觀卽是吾已外吾形

對菊記西浦先生覺華寺詠菊詩感賦

百年應不再茲人吾敢私偶然金玉飾山澤乃其姿
平生元亮意聊賦覺華詩天霜苦不貸日暮多所思
殘蹤適山房晚芳紛離披時物有如此九原安可期
遠望南海外風馭焉躑躅邇來玄都觀春華競一時

水閣

登山復登閣數客隨余步經秋楓更丹照日瀑逾素
坐來壑雲歸莽然楊州暮適志聊爾耳茲遊今已屢
德雨諸人來

朝聞烏鵲噪空枝老釋先知客到期德雨能携蓮巷

酒惟明已賦佛巖詩齋居縱陋山爭秀冬月猶暄菊
未衰此地同遊宜汝輩預愁歸騎度溪湄

曉吟

披衣正是曉鍾時百感中來坐似癡貝葉有書渾懶
讀孤燈偏照楚臣辭

北軒居士集卷之二

囚海錄詩

制除久而未有詩偶覽先君子在謫除服後贈
吳興叔詩感次其韻

窮溟吾兩世接踵古無如舍館還仍舊山川豈改初
真甘化虫鼠敢恨傍蛟魚善和京中宅塵生手澤書
其二

此島人饒舌先君謂莫如稀聞占鵬日快覩賜環初
櫪上無多馬盤中輒缺魚橘林羣子弟但得飽詩書
其三

朝朝望船至玄髮欲皤如只爲偏慈在猶思兩訣初
老年誰弄雀囚服或垂魚何似南溟外三春僅一書

其四

古人多不免惟我更誰如作易知憂在觀詩感亂初
天長依魍魎海濶狎鯨魚梁獄何寬法鄒陽自上書

其五

安排美莊叟變易驗真如敢道由人故應從賦命初
傷弓無定鳥涸轍有窮魚要似冰消夏虞卿且著書

其六屬興叔

興叔相逢未幾登科方赴殿試因
來人寄書以此詩荅之并送諸作

興叔瀛洲傑才華儘蔚如漂萍逢獲再啖蔗味逾初

羽窟方幽繇龍門見躍魚升沉萬里隔顏面且憑書

自東泉移寓山池

東泉是故居豈無并州情山池有何好而可菟裘營
我有痞結病散步須得生閭閻勢不便且就寬而清
懶性厭應接兼欲省將迎是身於是州去畱宜自輕
父老與兒童相送若遠行謂余驂已駕今將東出城
何不趨別浦懸帆指漢京我言有仙分天教遍蓬瀛
一勺山池水不飲道不成飲罷腋生翰飄飄凌八紘
何必舟與馬然後登脩程羣童拍手笑老者嗟嘆并
窮愁聊戲謔習氣時復呈長歌甚於哭世俗聞應驚

其二

宅後青山岑庭前碧海水風煙臨莽蕩花竹看明媚
最愛巖下泉清甘無與比移居豈不宜一區兼衆美
而我最窮人萬感在腸裏信美難久留可傷非可喜
自夫達者觀豈不謂我鄙無論禍與福皆有足且止
客有呼我言爾今猶不歿不記前年秋囊頭遠就理
爾方爲魚肉人方爲刀几海山與花竹當時寧有此
爾復有希覬天其不厭爾默念我平生客言良亦是
我實蒙於道素行非敢擬膾炙孰聞名不若食而肯
嗟哉豈惟客聞之延平子

卽事

首夏天氣和楊柳更濃碧閒庭懶掃除未見屐履跡
時聞鳴聲好黃雀坐巖石旣靜則思動出門聊散策
幽尋掇芳華獨往窺泉脉此事尚屬我朝晝惟所擇
窮居觀物理衆妙歸抽繹優遊但努力萬古誰非客

臨水偶吟

清泉非一道瀉出幽巖隈何人就傍邊列石略如臺
倚石臨泉流雲影拂蒼苔却立即溟渤送汝那復廻
且可住少時照我雙鬢摧我實愚之甚豈特柳子哉
胡然此相守世人應見哈惟人不我與魚鳥殊無猜

次先集韻

聚石爲門不用關其中數畝着吾閒望洋但恐如河
伯飲水聊將學巷顏半夜斗杓遙 象闕三更炎瘴
暗囚山非能遠引虛無外已愧優遊可否閒

其二

二千里外隔鄉關日日思歸不暫閒禦魅固應知
聖惠倚閣那忍想慈顏免將微命輸金木贏得離憂
滿海山輿志他年誰我錄北城川畔屋三間

次先集韻

一喘纔延九歎中此身那復計窮通唯看巨浸雄天

下未信茲邦屬我東怨禍自知慙有道昏冥猶可學
無功經年伏枕風濤開夜夜渾添髮上蓬

山池七歌

有客有客山池客一身百罪凡四謫百罪在身不自
知但道蒼天照心赤汪汪南溟幾萬里聖恩爲大
南溟窄嗚呼一歌今不成歌中夜撫枕淚滂沱

其二

蒼松古木廣陵山我夢一夕一往還憶昨拜掃仍辭
訣櫟馬布鞍草露間昊天未報恩罔極衣袖猶餘血
雙斑嗚呼二歌今歌便哭何況東泉覽遺躅

其三

有母有母闕溫清大母八十更衰病非無聖王先
無告不容惡子相爲命憂多反恐消息來叵耐津頭
北風勁嗚呼三歌兮歌欲絕草木盡帶啼烏血

其四

有弟有弟有七人疾病飢寒各不聞誰從瘴江收吾
骨倘復花園序天倫嗷嗷鴻鴈怨失羣海濶天高秋
復春嗚呼四歌兮歌正悲不忍重讀急難詩

其五

有妻有妻身姓李百年相從憂患裏今年且欲渡海

來聞道釵釧賣東市風波瘴毒人不堪爾有何辜同
我歿嗚呼五歌兮歌轉悽但期他生作夫妻

其六

有兒有兒兩箇兒大述孱迷小述癡但願無病在母
側不願從師讀書詩吾家兩世仍此厄世故他年那
復知嗚呼六歌兮歌逾迫孟博平生不爲惡

其七

吾聞漢挈之山億萬丈俯視滄溟平似掌少日爲文
慕子長壯觀欲使胸懷盪至今寂寞閉門坐門外蓬
蒿隨日長嗚呼七歌兮歌止此無復河南觀獵喜

月夜望海

朝見海水赤暮見海水碧雲煙變態陰晴異海水何
嘗自爲色夜來清景最奇絕白月素波光相射水晶
宮裏玻瓈盤玉女欲捧不勝寒又有星辰萬顆珠一
時散落仍平鋪龍公自擅天下美衆魚踴躍爲歡娛
吾生與海有因緣十載重居海上村海上無人愛此
景縱能愛之何能言舉杯吾欲酹龍公此景在海不
在龍海本不能自爲色終讓冰輪第一功未可屑屑
論主客三杯且遣興無窮須識吾言亦戲耳空卽是
色色卽空

園中卽景

雨好晴方好
溟中况苦霖
恐終無白日
欣此出重陰
紫燕時翻翼
玄蟬欲放音
幽人亦起色
杖屨試園林
其二

久飲嘉川水
仍居柳氏園
終然拘海島
豈有信乾坤
落景低殘郭
孤煙淡遠村
倦來聊騁望
銷得幾時魂
牧使送酒用東坡謝人惠酒韻

我本寓於形
形今於何寓
寓恐無幾時
瘴癘侵晨暮
非好楚大夫
亦笑晉吏部
因病頗思飲
坐貧難常酤
孰謂節制營
似與遷客具
一壺破困窮
珍重千絹素

載馬船

東風初日照朝天泛送升艘載馬船遠望不見船中
馬但看船有雙帆懸聞道驊驎百千匹監吏押領年
復年馬從海島走京師何啻出谷喬木遷駿良常待
至尊御白玉爲鞍黃金韉祝融風伯勤護送羣龍海
若相周旋三道諸州具青芻禮有式馬誰敢愆君不
見越溪女兒朝浣紗暮入吳王宮裏眠又不見炎州
荔枝妃子笑一笑何論費萬千尤物奇逢亦一時其
奈奢淫禍所纏龜魚輦翟充服用惟正之供自古先
地行應難如鬣者此島又復同渭汧胡元未論逐水

草盛代咸稱秉塞淵近年島馬漸多驚無乃房星移
舊躔大耳短肚皆入貢或有一步煩百鞭若道龍種
必在此卽同膠柱空操絃但教善相如伯樂豈不一
顧城東壓而况吾君如漢文有馬惟應旗在前我
願三百六十州愛人養士如馬然飢不必食玉山禾
渴不必飲月窟泉亦不必懸臺上金樂育但取菁莪
篇坐見邊吏奏良馬西戎畏服潞公賢此島還須用
貊道畱與居民踏私田

島土浮燥以馬
踏田然後耕之

謫居感懷

遺踪一十八回秋父子相仍海外囚豈有頑腸如木

石猶知嘉惠重山丘獨憐日月隨人照長恐乾坤共
我浮千古應論情與境此身行止自悠悠

其二

別將城中有李君折衝白老亦居民我今再度投孤
島渠自前時作主人每爲飢寒煩丐貸更將懷抱話
悲辛鵝山魏謝聊相好似亦三生未了因

李君名煥即故掌令

漢之孫掌令於昏朝時立節謫居于濟州云煥以武
出身實與先君同年以州校歷千掄爲別將李氏於
吾有通家誼始先君之謫來也煥爲盡誠其子重發
重茂受學於先君君有義有名於諸生中白名大龍雖爲
濟人實於先君外黨有戚分始爲吏旋閑居納粟受
爵亦嘗盡誠於先君及余之來皆不習舊好李之父
子與白之子尚勲致勲瑞勲其孫喜敏圭三喜圭更
迭來候於所寓時見周急又未嘗不念舊興感也

其三

山南佳士有吳高龍榜今年並折號憶我趨庭披彩
服看君問字載芳醪相將感淚開青眼共訝枯形具
白毛好是飛騰千里駿能忘善相九方臯吳名廷賓
與叔即其
字也早受學於申執義謫居濟州時文藝蔚然仍遊
京師即登上庠及先君之來又委身請業先君甚嘉
之所贈詩有曰山南佳士飲詩書高名萬瞻初名萬
秋自幼受業於先君先君於諸生中特示獎與期其
有成兩人與吾情義可知而吾適重來值
御史試才見其登科追念悲喜亦如何也

其四

人間已已至今悲祥鳳摧殘困怒鴟落日襟懷蘭蕙
佩高山悵望橘林祠是非自足論當世窮達何宜較

一時絳帳青衿多舊學有誰終始悅周尼

濟州有橋林書院即

冲庵以下四賢所享而追以尤齋並享者也先君於謫中有詩歷頌四賢而末篇別頌尤齋有曰他時公議定應共享精禋云濟之諸生非不知有五賢之可尊而以其遐陋故於凡賢邪是非率不能見且雖嘗受業於先君而先君北歸之後於陵之室又非伯夷之所築矣豈知籍湜之不去也顧余所處固不敢與人論所謂賢邪是非者而亦不能無慨然也

其五

孰能處患得心安先子曾優古所難固有千愁生眼

底何曾一事見眉端良辰綠蟻休深酌靜夜青編好

細看話舊居人仍勗我春陽同煦海同寬

先君處患一節亦儘

有可觀不肖欲學之而恨未能也

其六

每憶往時潘廣文官閒日叩謫居門垂垂霜髮三千
丈灑灑香醪五石樽未怪彎弧知柳葉常看薦枕有
桃根海山兜率憑誰問玉碎花飄可更論潘名尹衛
湖南咸悅
人先君謫居時潘爲教授每具酒來訪甚歡也其老
而強力善飲能射之實已見於先君所贈潘詩若序
且有愛妓桂貞先君每用戲謔亦及於詩文中
者也潘亡已久而桂貞又以事被官杖而死云

其七

嘗構書齋扁養真茅茨雖陋可容身欲勤董子三餘
業常置曾生五七人坐摘園柑充晚食起邀海月作
嘉賓荒墟此夕衣沾露俯仰其如已劫塵

其八

東水門前弄碧漪清風臺畔走荒陂月明曾使空樽
對花發相將好客隨一樂我曾輕外患四難人亦美
當時祇今未死孤生在心折聊成感舊詩

六月十二日夜對月次東坡是夜步月韻

鯨波萬頃蟾影翻餘光爲我窺空軒天晴六月亦寒
露洗出仙宮丹桂根披衣起望久不寐月若有情應
與言頗似昔年龍江夜江樓有誰招我魂

偶吟

欲整衣冠奈懶何開門時少閉門多至今已悔知奇

字剛喜無人載酒過

久以惡風舟船往來阻絕

海上狂風一月餘北方信息杳何如已拚死受青蠅
弔猶欲生傳白鴈書戍卒高臺空悵望漁舟近渚亦
躊躇憑誰少戢蜚廉虐恨莫升天訟玉除

聞次兒病夭用東坡哭子韻

俛仰八載間忽焉爲父子提抱固已憊萬里情何似
我窮最生人此禍稀前史喪明昧大義西河吾所耻
不憂太放達東門亦非喜千古猶一心何殊吾於爾
區區忍不忍二子不寸耳唯將淚添海遙遙達漢水

其二

始聞未暇哭已念父難忘只願是夢境其實汝不亡
或慚有覺時昏眠不下床終然真非夢起坐旋復僵
汝形與汝聲思之不敢詳固亦出天性無乃笑大方
以此病父淚知汝弱母腸要皆不能父所幸無幾傷
悼朴休文詩

余聞休文之亡卽爲作文倩弟致仲祭之於
其靈頗著其大節顧於平昔遊從契濶之舊
猶有未悉焉者故作悼休文詩

往在廻瀾日有客敲柴門屢迎豈是粲目擊真如溫

平生仰翠老不意有佳孫以我尚友願勉子家聲敦
子誠不齷齪惟恐同濁淖我本一怪民罪謗紛騰喧
人多爲敵讐子乃視弟昆寒天拾赤栗魚蟹霑我殮
夜靜共看書青燈照幽軒我歸嘉會宅子投黃驪村
乍別卽相值僑居接墻垣我身在京華何異囚籠樊
賴有子過從庶得窮朝昏憶昨歲辛巳不弔喪 坤
元宮闈慘妖孽萬姓含憤寃時人忽大義獄案幾中
翻子以一布衣瀝血號 天閭非無越俎嫌慷慨性
所根我實懦怯人豈能助黜賁徒緣相親故指目不
勝繁一言便成罪孤忠誰見原冠山瘴癘阨子如樂

土奔臺章踵賊誣我又戒南轅嚴程迫深冬前後雪
一痕橫天蘆嶺高中分兩湘沅相望不相見書札問
寒暄我先子仍隨生還俱 聖恩顏髮喜不改心期
况可諉有情雖澹庵消渴非文園一讀遊山記病體
欲高騫子於百家文最喜明茅坤出語雅而麗論價
璵與璠縱然爲世嫉想或感 至尊畸蹤憐踽踽良
覲幸源源亦有我羣季倡和並篋塤江樓春對榻溪
寺秋開樽恐令兒輩覺且滌憂心煩念子素孤寒親
黨少攀援獨有一孟光無資可養豚驥蛭伏櫪老虱
欲談事捫急人輕施與意氣山可掀勉子入中庸拙

言豈棄藩世方荆棘場所期在蘭蓀翻雲與覆雨時
論又一番三言市有虎一網火炎崑高天厚地間至
冤那復論羣陰蔽太陽餘光照覆盆我旣脫鼎鑊子
終免黥髡邈此千羅國送我傍鼉鼉尚意有後期淚
落聲各吞我從入海來一病劇溫屯分知卽填壑子
應招我魂孰謂聞子訃方食驚忽噴嗚呼豈其然此
心如風旛經旬巷南北兩情猶嬋媛况此萬古訣曾
不執手言倩人酌觴酒託夢送靈輜奇窮竟無年報
施道久惛仍無鄧攸兒未就戴良婚小人多頑福胡
耆又昌蕃已矣勿復道人生孰長存且待千載下分

別王孫猷

七夕不雨

天街月明微雲收
唯有金風作新秋
牽牛織女事恍
惚此說何人傳
謬悠有淚洒作雨
滂沱如今不雨將
謂何怨女曠夫滿
人間屈原伯奇尤
可歎若使此人
淚作雨
后土應難一日乾
天老無知但冥冥
亦恐牛
女俱忘情
濟州無鵲也有烏
信向銀河作橋無

久旱有雨次東坡喜雨韻

今年五月太多雨
六月七月旱更苦
咫尺天池萬頃
水無救
驕陽焦厚土
水中無數懶蛟龍
血可塗鞭雲

不吐神鵬坐失圖南期應爲炎天惜毛羽已愁虐魃
氣轉熾况兼飛蝗勢莫禦彈丸黑子縱云小哀此居
人萬千戶絕域未能通有無移民移粟徒聞古前者
屢煩監河侯得不償勞寧有補李侯爲政今二載民
謂李侯吾父母夜看星辰晝占風四野何殊親手撫
急持牐幣走山川已屏佳人罷歌舞祭後歸時聞輕
雷赤子方啼得甘乳一霈三日蘇羣枯天實應之但
不語百姓謳謠軍吏賀李侯不有歸 聖主似聞北
方時雨若千里無人憂百畝天灾已免呼庚癸地紀
奚論分子午徑須伐取掣山林待到秋成作倉庾烹

羊宰牛始爲樂下自閭閻達官府浦邊病客耳雖聾
尚聞八域歡聲普但令飽食容方朔未害餐氈老蘇
武

在耽羅則無往而非山海而所寓兼有泉石林
木之勝分爲十詠鉅細不妨各屬於一絕

逸三

海

我雖在人間焉識有天地不敢夜開窗恐驚羣龍睡

山

我坐此山中山於我何有無頭一穹窿知在後峰後

泉

清泉滃然出大旱不能枯若變作春酒忘愁仍忘吾

石

有石坐斯可何須餐髓香長教陶令醉勿化初平羊

松

最愛短短松介然雜木中玄冬霜雪後畱汝伴衰翁

櫻桃

庭畔朱櫻樹我來初熟辰未曾霑御賜猶愧獨嘗新

葡萄

葡萄青一架蕪沒並蒿萊莫怪勤將護寧無漢使來

秋涼次前惡風韻

共喜清風大暑餘南荒不啻故人如已收破扇蔽深
篋却喚孤燈照細書縱噪寒蟬猶局促將飛病葉敢
躊躇自今便作周年事蕭瑟羈懷孰可除

憶朴淵舊遊

朴淵雖在海之東勝絕要爭天下雄詔使東來飲其
流爲言味與廬山同

詔使給事中魏時亮廬山人於
道上飲朴淵下流而有云云

我昔行吟朴淵下正值淫霖五月中金陵使君愛山

水東陽老守真仙翁

金陵守即徐公文
叔東陽金公景

興來携我遊

朴淵共看怒沫當晴空疑是銀河落九天更有何語
堪形容對坐不敢通一言傍有百千天雷公驚魂駭

魄僅收拾歸卧雲興佛燈紅浮生宦謫有此奇夜夢
各謝淵中龍明朝欲上萬景臺愈覺兩腋生清風山
中物色知多少不容雙垂千尺虹我言造物太不讓
似與遊人誇大功世間萬事撿一時事過誰能追去
鴻七載重遊尋舊跡居僧笑我歸忽忽老仙已逝使
君老我今飄泊泣途窮賞心非復朴淵時挈山固亦
稱瀛蓬

述楞伽舊遊寄啓元

春山日暖禽鳥翔洞口桃花流水香水邊下馬步入
山石徑藜杖聲琳琅穿青度密不辭遠但聞鍾磬投

禪房寺名來蘇識唐將道場幾時隣戰場何不更致
眉山蘇籠絡風煙歸錦囊孤庵寄在最高頂老松脩
竹舍清涼庵前靈鷲蹲萬古我來踞坐爲胡床來蘇
已了又實相峻嶺纔過仍平岡天公似欲助我遊一
川疎雨爭斜陽巖際深潭深莫測水黑知有蛟龍藏
夜對高僧問古跡其言往往多荒唐新羅興廢已千
載元曉精靈知在亡且促籃輿上磨天俯看碧海雲
蒼茫海濶天空苦多風吹我鬢鬆雙髮霜回頭却望
美人處杳杳長安塵霧黃平生飽聞楞伽勝恩許楞
伽爲吾鄉一病經年不出門兀然與山長相望起余

者誰李啓元命駕千里情何長當時若微共汝遊未
必歸後真難忘此身輾轉今到此海山固有無相將
豈惟窮人自窮愁却恐海山愁無光作詩寄汝當畫
圖楞伽却在蓮華坊

秋夜

客愁無日不如秋及至逢秋愁更愁人靜候虫同此
夜天長賓鴈自何州十生九歿搔雙鬢百巧千窮攬
一裘故國茫茫消息斷明朝應復望歸舟

無睡漫吟

恨未生逢軒與岐不知無睡若何醫厭聞風浦潮聲

壯况值秋窻曙色遲爐火坐添煙斷續案書卧對字
傾歌但教整得千愁亂萬里那無夢去時

漫用前韻

謫居度日恰三秋除却鄉愁豈有愁天下幾人窮似
我海中一點邈爲州也應不舛憑書札尚欲謀生具
葛裘漁父無心問憔悴葦間唯見弄扁舟

醉後戲題

乞粟釀爲酒與客連日醉粟本非我有獨飲實無義
客言何不斷此酒我笑不答惟舉觴前年牢狴幸生
全更試風波兼瘴煙千愁百病可奈何也知我命存

乎天酒泉未必爲黃泉君不見賈生悲傷卒殞身又
不見韓子禱歿二妃神我今不歿不禱但飲酒挈山
海水長如春

秋夕前一日偶閱坡詩得君門深九重墳墓在

萬里之句遂分韻爲十絕句

君與墳爲一韻
故代以丘云

默默此身事言之徒自勤已休尤執法終不怨
明君

其二

頗怪三閭隘離騷不頌恩昔時伍太傅何止隔脩門

其三

山池容我在暇日便登臨逝水惟東急浮雲自北深
其四

古來放逐士非無聖明后絳灌亦何人氣數有陽九
其五

尻輿駕神馬邈矣欲誰從碧海不難越黃塵知幾重
其六

人情重追遠拜掃又中秋豈獨柳州感東西曾歎丘
其七

瑟瑟松間風淒淒草際露分明夜夢中祭我蘆山墓
其八

魂已返蘆山形獨畱絕海魂形久相離焉知吾所在
其九

紛紛人與物有生誰非願生或不如死苦樂應相萬
其十

吾愛管寧翁布衣躬先祀浮海幾歲年天教歸故里
李主人餽以祭餘

耽羅陋俗何不有猶幸人生葛伯後雞林李君名家
孫禮法尤勤祭父母每將祭餘餽遷客窮途一飽良
非偶我辭丘墳萬里外北向長號柳子厚見人致膳
能安受尚思蘆山與栗村我自邀人勸我酒形枯心

歿身無幾朝晝所營猶爲口細思豈非黔敖食欲驕
更無齊人婦

中秋無月

頑雲如墨雨如酥薄暮濤聲鬧坐隅徒爲佳辰催索
句更無明月與傾壺一年人共須今夜此事天應厭
老夫安得乘槎遊汗漫廣寒宮遠隔清都

十六夜對月

秋霖新霽可登臺逐客孤懷得暫開碧海渾無雲一
點長風獨與月俱來從教蘭佩霑霜露要喚仙人勸
酒杯只恐明朝更愁絕良辰美景苦相催

十六夜對月次蘇氏兄弟見月相寄答之韻寄

仲施要和

八月天清月輪高月中玉兔呈纖毫月色由來隨處
好最好海月臨層濤虛明更無一膜子不知水月誰
真水反思前宵風雨惡喜甚雨晴波不起謫居日月
如跳丸蛟龍已迫寒沙蟠長安萬戶砧杵動也應家
人念我寒南溟北漢作泗汴縮地誰能試奇變獨有
招魂楚臣辭時自高吟碎手板人生遠別愁如山舉
杯澆愁愁更堅參商兩地姜被冷此夜此月誰同看
故園物色豈復好昨夢池塘但衰草平生相勗歲寒

期卽恐吾歿君隨老君今獨憂菽水貧對月酣歌我
何人往事更堪血淚出俱是昔年東泉客

雞犬

客裏唯雞犬無人獨爾隨桀堯端爲主風雨也知時
物性誰能奪吾詩感在茲今年蝗蔽野那免共號飢

失馬

我不自負薪有僕仍畜馬果然造物憎其奢奪而匿
之山林下山深林密求不得或恐爲龍學變化僕乃
尤造物我言慎勿尤有馬憂失馬無馬更不憂知福
知禍塞上翁以非喻非蒙莊周

聞金吾郎爲拿我來到北岸有作

此事年年豈足驚細思不識罪何名
主恩如海無由報擬律惟應萬死經

被拿候風於浦口感吟

坐待帆檣趁順風此冤惟信有皇穹
終南渭水行當見却勝前時在夢中

誣告者承款吾得仍配而都事張君世好也於
其歸以詩爲別

君來捕我急如星我恐三言惑
聖明十日望洋臺
下宿依然仍作濟州氓

其二

千年三乙有荒墟正好奇窮此謫居坐使故人勤涉
險鯨波萬頃愧吾餘

其三

我今仍在送君還憂喜餘情更黯然北極南溟無限
意離亭况又號朝天

其四

候風且莫歎淹遲會有雙帆穩掛時我作老親書幾
束一言未敢及歸期

其五

別愁無奈海天長君是歸人也斷腸歸向洛中親舊
道殘魂難復待巫陽

資糧既盡於患難仍配之後遂乞食於白主人
而歲又凶矣不免有飢餓之患

我貧欲乞食亦無瓢可持主人數畝田田瘠蝗自肥
天之所試我固有甚於飢棄置勿復道商聲聊此詩
患難時高萬瞻李重發等不特効其知舊之情
實有古人風義感而有述

被命卽候風十日別刀浦人皆以死期吾亦厭生
苦沉沉空館夕海氛蒸成雨孤燈照幽寢蟬風兼沙

土惟聞打城潮洶蕩誰爲怒有身無所容有懷無所
吐平生高與李高義傾今古闖然來見我守卒混爲
伍一笑收涕淚數語出肺腑所賴天日明豈信市
有虎買馬送我僕寄書與弟普尺楮或寸綿一一錄
爲簿忽又從北來妖兇已伏斧我冤不待辨憂喜一
仰俯海南真吾鄉親知復相聚樂哉山池含清泉暎
茂樹昔與高李飲往跡堪自撫窮途有若等庶幾免
涼踞死生心不變此事稀聞覩歲寒知後凋至言欽
孔父誰其薦士者奇寶委草莽不負一罪囚何況

國與主

夜作

黯黯愁和睡迢迢夜似年
蟄虫吟壁內飢鼠走燈前
靜觀今聊爾窮居亦幸焉
還思囚別館不敢怨蒼天
方擬釀酒以作重陽而被拿
在浦口重陽之翌日乃免
竟不得登高一暢追賦三絕句
預愁佳節客中廻猶欲銷愁
賴酒杯縱使登高有何好
登高還復被魔猜

其二

殊方白髮愁邊老故國黃花夢裏開
雲海茫茫斷南北不如無上望鄉臺

其三

村醪亦足洗枯腸
南國黃花帶雪香
但得興來携客出
登高何必用重陽

絕句

愁來正合閉重門
休見黏天雪浪翻
日日望船船不至
杵歌聲裏又黃昏

因病廢述作行

十日卧床呼不起
兀然如醉非真醉
莫歎因病廢述作
破除此事都無事
平生鉛槧是習氣
謫居牢騷更娛戲
渾渾噩噩正而葩
才薄何能望以跂
龍門之文

杜陵詩後來矯矯廬與眉時或髣髴亦已疲我縱不
廢將焉用樊帚千金良足嗤祇今欲法天無語且休
往問維摩師

病起作詩

維摩雖不言忽然誦千偈我病乍廢詩病起詩又繼
作詩未害定廢詩非無慧詩在定慧間循環不可際
當時在何處與我俱出世

偶吟

殘生寂寞滯蠻村每倚孤城望海門落木寒潮愁絕
處秋來未有可招魂

秋興

萬里柴門海上村
挈山愁色對黃昏
魚龍影靜滄波冷
橘柚香生白露繁
何代獨無遭困厄
此身猶得荷仁恩
朝天館外來帆斷
北斗迢迢接故園

其二

天池之外太山墟
萬死投荒一載餘
異地星霜逾覺疾
中年齒髮不禁疎
黃花已負東籬酒
白鴈難憑上苑書
寂寂孤城衰草裏
閉門誰復問幽居

其三

百年身事備艱難
轉覺浮生意易闌
烏鳥林間西日

急鵲鵲原上北風寒幾回望海頭催白兼爲悲秋淚
不乾阿大中郎曾一網楚臣蘭佩各天端

其四

五賢相繼此蠻貊多是當年澤畔囚神武宮門長夜
色黃驪仙寢白雲愁秋風想像荷衣潔廟宇陰森
橘樹幽人事世途無限感東泉何況日東流

其五

目極高秋短景前海山無處不茫然天涯漸覺親殊
俗客裏誰能挽逝年都統威名猶草木乙那興廢只
風煙宣綸絕域知麟鳳近代清翁萬口傳

其六

幽棲日晚啓柴荆
蕭瑟誰憐逐客情
落木無邊聊遠望
浮雲何事又南征
逢秋已愧吳張翰
作賦能追漢賈生
應見海邦風俗變
祇今賢俊贊升平

其七

耽羅物色異瞻聆
鉅海圓山共杳冥
把釣誰如龍伯國
舉杯吾勸老人星
文章太史能無助
正直韓公會
有靈好是秋風涼
冷後只愁衰疾怯郊坰

其八

蘆山霜露感深秋
別後隣朋摠在不
舊種松杉催我

老良辰雞酒共誰遊鳥飛終欲巢深樹狐死還應首
故丘雲海蒼茫千萬里夢魂遙隔漢南州

奉懷仲父德山貶所十八韻

餘生荼毒後期奉竹林歡霜露丘原冷風波世路難
流離同禍網信宿並征鞍白日瞻黃道高秋泣紫蘭
讒言終罔極恩譴更休嘆內浦憐深阻南溟益渺
漫險奇宜有此孤直詎能安獨鶴晴空迴羣鴉暝樹
寒朝廷思大老禮樂備皇壇自致三階正寧勞一
寸丹圖書堪跌蕩髣髴衰殘只爲慈顏隔應難別
淚乾蒼天竟誰問百世要人看鴻鴈音微靜魚龍歲

色闌有時憑夢寐何以破憂端
羯末知無忝嚴敦愧
自觀祗今悲薄祚更欲勸加餐
長羨雲間鵠高飛有
羽翰

謫舍

謫舍疎籬傍古城有時登眺遣孤情
漁人小艇乘潮
落杵女清歌向月明
家在北京書未達
秋來南海瘴
猶生虞翻浪欲逢知己只合相隨并服氓

濟州雜詩謾用子美秦州雜詩韻

擾擾百年事棲棲萬里遊
地應須賤跡天實與窮愁
破屋蛟龍雨荒園橘柚秋
颿船長北指吾欲爲誰畱

其二

流離吾敢恨賈誼亦長沙浩蕩疑無地參差夢隔家
火維高鳥影木道片帆斜冬夏兼裘扇居人或自誇

其三

冲庵隨二宋竄謫記當時北斗高名在東京志士悲
橘林秋欲老風馭降何遲斯道今無託蒼天且任之

其四

乾坤金與鄭曾到濟州歸萬國瞻熒惑孤臣泣紫微
澗寒松自秀風急草全稀陳跡孤城裏還思漢堞圍

其五

誰分蝸一角落在鉅波間
氓俗穿皮服村居掩石關
鹵田多不種風舶動無還
北客來茲土那能免苦顏

其六

此島有人物于今年幾迴
神仙丹穴出伉儷玉函來
霸氣曾消盡文明遂漸闕
建祠雖報本遙遠不能哀

其七

開營紆節制設險敞樓亭
鯨海風波息蛇山草木青
東臨漆齒國西指老人星
聖代昇平久煙塵靜四

垌

其八

萬匹驊驄盛千林橘柚繁楊州猶錫貢博望謾尋源
聯屬隨孤棹奔趨動幾村感渠生絕域容易入天門

其九

聖朝恩及遠挈岳比應低移粟霑紅腐頒綸降紫
泥九防分險阻三邑列東西萬世期酬答絃歌與鼓
鼙

其十

傳聞漢挈頂仙侶此爲家玉洞藏琪樹清潭照白沙
驅羊應化石食棗恐如瓜恍惚從誰問春來但落花

其十一

海外最窮處壺中別有天前賢多歷覽舊俗競流傳
奇石兼幽窟高林帶冽泉誰如翠屏勝傍眺碧無邊

其十二

疾病三秋劇流遷二載強海山當座近霜髮共秋長
幽蟄同蛇蚓飛騰愧驪驪焉能乘逸興杖屨入青蒼

其十三

嘉樂清泉上茅茨半畝宮山光開戶有竹葉護堦空
往跡悲蘭佩餘生感樹風他年輿地志毋忘故城東

其十四

山池新卜宅端爲有清泉趣自靜中得聲誰空外傳

開樽秋柳下移席晚潮邊狼狽仍遷徙回頭一悵然

其十五

門巷城西角吾將老此間飢寒猶覓句愁病且看山
賈客秋爭出樵童暮各還難逢白衣酒籬菊爲誰斑

其十六

舟犯鯨鯢怒居同麋鹿羣衣裳寒襲露瘴癘氣成雲
故國何年返中天片月分春歌自怨別悽切不堪聞

其十七

元戎多暇日處處領風光遊獄聯驍騎聽潮倚女墻
雅歌觀德榭緩帶運籌堂應與吾民共歡聲似水長

其十八

或有宦遊客畱連不憶歸醇醪添氣象紅粉倍光輝
良馬常多取潛珠亦暗飛島氓何所望御史有霜威

其十九

彈丸孤島內民事自艱難不料秋蝗作還承夏雨乾
波臣江水遠葛屨曉霜寒向者祈禳苦村村謾築壇

其二十

殊方爲客再亦有故相知白髮羞佳妓開顏賴小兒
塊居西郭里瓢飲內山池自是傷弓鳥巢傾敢擇枝

望海

蕩蕩茫茫吾敢知聞名自古是天池乾坤俯仰誰爭
大日月升沉只在斯坐看百川趨萬里特於東國屬
南維羣龍寧有不平事劇雨剛風無歇時

清風臺

清風臺上風起自海山中臺前萬物一披拂城郭川
原破幽鬱草木無情也有聲似與騷人鳴不平我欲
乘風凌汗漫扶桑咸池恣遊翫扶桑咸池杳何許欲
往從之奈無女忽然凝神收散魄風吹直到長安陌
長安陌上不可畱黃霧紅塵使人愁復恐清風到便
休還歸此臺前雙袖猶飄然

深巷

深巷關門深更幽隣童相過暫啁啾久忘盥櫛知吾
懶時出篇章莫與酬赤葉無多秋謝跡黃雲不動雨
含愁從他物色乖時候已怪全生瘴癘

秋盡

秋盡冬來霜欲冰天時人事莽相仍窮陰霾日乾坤
閉大海翻風霹靂騰絕域生涯資半菽故鄉愁緒對
孤燈夜寒似有門前雪坯蟄渾無興可乘

夢與述兒遊溪寺宛如舊時

大興寺在漢城東萬里居然擲一筇閒見老僧秋拾

栗戲教稚子夜鳴鍾清溪未洗三生障落葉應埋四
載蹤驚起風濤推枕處海天明月照西峰

雜吟

秋來無異逢強敵秋去還如別故人紫菊丹楓俱掃
地寒鴉落日倍傷神

其二

只是人生長有愁天時代謝自悠悠挈山屹與吾相
對也復經秋白盡頭

謫中書事哀句成篇殊無次序然皆實境也

嗟來不厭黔敖食霖雨何須子輿飯客子顏厚每忸

怳主人義重猶縑綫蝗餘田豆落已空霜後山禾收
亦晚平生耻作蠹書虫垂老甘爲飲河鼯更無脩能
可擬原徒有窮途却甚阮寓居不敢嫌寂寥衰疾何
時獲平穩倚杖看山眼欲寒登高望海心逾遠縱復
出遊應偃偃時或興到難衮衮經言道學奈庸資史
載興亡激悲悃短章小詩略安排篆刻青紅昧根本
儘是百巧兼千窮未見一益增十損新知只應熟顏
面舊識亦多疎情懇書編已謝諸生挾駿帽不要隣
人捆營妓遨遊自笑言村童亂聒仍逃遁樽醪隨得
任醕酤博塞從人譏拙蹇夜夜空勞夢魂牽朝朝惟

問舟船返幸免吳江浮子胥敢怨羽山囚伯鯨人生
有命且優遊 聖恩如天聊息偃

詠濟州

纔寬金木此幽囚頗喜輿圖有濟州須識二儀同鳥
卵莫疑孤島在鰲頭湖關北隔三韓土閩浙西通萬
里舟但得朝廷文物盛不妨遐俗自羶裘

其二

島土無黏石作墻屋山編木避風狂儒生不解羞羶
笠妓女誰能厭布裳相杵村中歌自苦驅牛壠上嘯
何長居夷休歎茲邦陋尚有秋園晚橘香

地多風雖
儒生必羶

笠而出野妓甚貧不能恒着綾羅
杵歌與驅牛馬之聲皆絕異於陸

孤城

孤城曉色角聲中小雨初收昨夜濛雲逐黑龍歸鉅
壑浪翻紅日上層空客居已識望弦水鄉信唯思西
北風如許年光那易度邇來顏鬢漸成翁

夜吟

未敢論孤憤惟宜賦遠征靜中多舊事愁處厭吾生
門巷山精聚衾裯海月橫嘶鳴仍達曙櫪馬又何情

夢問海

夢問海嗟爾巨浸何茫茫我無舟船與餽糧越爾如

康莊周流四方上下天地咫尺視萬里爾終不能爲
吾累

海答夢

海答夢天地萬物爾最虛我本似虛實亦實實不勝
虛非理歟雖然爾我皆有寓有寓則有故待爾主人
形開後不知却在何處

哭趙正卿五十韻

正卿實有不愧其爲重峰之孫尤庵之弟子
者顧與余深相好不以世之紛紛也而今亡
矣聞訃海上極悼之遂作此詩

早仰重峰叟高標北斗傍天人透關鍵氣節凜冰霜
君子真遺澤宗孫乃肯堂鉅儒垂準則函丈儼門牆
鬱鬱詩書囿森森禮法場家聲元特達師道更輝光
出入親熏炙周旋荷表揚旁搜資博洽餘力富詞章
從蔡當時事居東幾載強河南有邢恕魯國足臧倉
益礪隆賢志偏懷嫉惡腸陰陽交復姤宇宙再滄桑
天上騎星傳人間化碧萋諸生誰築室至痛爲摧梁
黑水狂瀾盛朱門正路荒王符惟著述郭泰且深藏
更化俄伸屈斯文豈補亡空山思虎豹大澤只魛鰐
古栢三冬翠精鏐百鍊剛青雲遙北闕素履日東

岡記識前修後躋登下士行未堪裨海嶽麤欲茁牛

羊趨走衣冠樊淹畱髮髮蒼歷年均頌祝宴樂擬鋪

張嘉穀風初偃蟠桃春欲香時有大風之災進宴難有王母獻桃之儀

禁葵向日忽報鳳鳴陽無逸陳經義持謙贊哲王

宸衷應有感臺謗亦何傷正卿之疏上優批宴亦不果行惟時輩愠甚至有

臺劾而上終不允跡賤聲名重官微學術彰聖躬無疾病

天位總權綱縱或宵衣倦寧宜脫屣忙儲宮深休

惕百辟盡憂遑手草一封奏民傾五部坊非專由職

責要與共彝常反汗欣爭覩廻天力可忘正卿之職乃部官也

當勸諭都民累萬人詰闕下正卿自草疏授之以呈

前此百僚庭爭累日而不能得至有都民疏上感動批以還寢之意又於筵中教及都民事至於含

涕淵源知不遠樹立佇流芳晚計尋丘壑冥心耻稻

梁寒齋仍服藥羸馬促還鄉奄忽魂長逝吁嗟理莫

詳止亭今寂寞農榭日淒涼正卿居沃川沃有重峰書院又就遺墟作堂名

以二止盖用高山景行之義也正卿所居尤庵親題其扁曰農隱堂舉世殺蘇軾唯君

知仲翔湖邊聯夜席江上對秋觴困厄慙銷挫衰遲

美激昂衆咻身肯顧獨立意彌長久喜友三益那期

天一方心肝猶兩照書札屢相將交態終誰在窮途

實備嘗吾生遂牢落此別劇蒼茫海濶鯨鯢壯城寒

草木黃楚騷與隣遂哀淚濕荷裳

寄高生允奎允翼兄弟

高氏好兄弟深情如爾稀十年渾一夢萬里復相依
大雪埋冬嶺孤城掩夕扉山陰興難盡白酒想雞肥
有弟

有弟附書至慈親病體安憂情常懍懍喜意亦悽酸
星斗秦城遠冰霜蠻海寒林鳥應反哺夜呌自無端

小屋

小屋洪濤上還疑尚在舟天長勞遠望歲晚歎稽留
疾病思家眷音書斷舊遊夜風頻攪枕何夢到王州
謹次從大父西浦先生南海絕句韻

吾家西浦先生之於不肖盖有父之慈而兼
師之嚴矣顧嘗蒙期許不淺而愚昧無聞重
以罪釁不惟自荒墜其家世緒業實累先生
知人之明大矣則未嘗不中夜慙痛已記昔
省親耽羅謫所先生方圍棘於嶺南之南海
間因舟船通起居兼以不肖所著詩文送質
先生極加稱賞以爲此足成家名世繼又曰
世方無文慎勿臨深自高也而其所最賞者
乃棲暝城鴉夕嘶寒櫪馬風荒村臨水僻獨
樹閉門空宴坐觀山皆好句出門臨水揔歸

心黑雲漏日犬爭吠碧樹含風蟬自吟等句也先生之於詩殆可謂文章中神仙不肖嘗欲學之而不能焉又其立論取法微有不同然妄竊以爲先生之詩宣城以後始入三昧嘗以質之先生亦不以爲不然也抑記兒時侍坐一日語及燕山殺挹翠軒事先生遽曰挹翠軒豈燕山殺之不肖悞而請曰寧有他乎先生徐答曰蘇東坡惡其勝已而殺之耳此固一時善謔而其推許翠軒之意可見則先生所立論又未嘗不與不肖同也至其南

海時一絕句曰萬木森森凍欲摧海風終夜
吼成雷燈前有客讀周易地底微陽迴未迴
妄謂此詩比宣城諸作益近神化足以掩全
藁無疑矣先生實有忠孝大節文章卽其餘
事其所以教不肖又不止於文章而罪釁危
喘益復懶廢并其餘事者而無望於承述以
副平日獎礪之勤其亦痛矣今又謫居耽島
感念舊事適值南至諷詠遺篇凍木吼風宛
然一景色矣遂涕泣而謹次原詩韻賦三絕
句將以遺從叔父光山公及再從弟龍光俾

知不肖此時之心云

恐說霜風蘭蕙摧獨畱名姓似春雷人間無處可讀
易地底微陽誰見廻

其二

未聞環復奄樑摧堪恨當時竟日雷露梁一碧連耽
島潮往潮來曾幾廻

其三

當日兒孫今髮摧更嗟時命屬雲雷耽溟詠罷露梁
句雪滿廣陵孤夢廻

盤龍硯歌贈任聖能

昔先君子得盤龍硯以遺不肖遂命工作匣
漆以黃置之案上小妹婿任聖能見而愛之
余欲以遺焉則先君子笑曰毋也待其詩學
長進賞之可乎今余孤居海國往事無非感
懷而聖能適寄詩來詩果長進矣卽何敢不
踐先君子之言也遂報家人出其硯於藏中
并此詩贈之

盤龍硯製作奇黃漆匣不陋又不侈憶在吾案上已
入爾心裏待汝能詩以賞之此言嘗聞我先子餘生
今日懷往事更忍便忘硯與爾詩來非復吳下蒙刮

目不知身萬里盤龍硯黃漆匣火急相贈復何俟當
封印剗羞項氏想見晴窗揮洒時變化風雨一勺水
無多摘取領下珠或恐龍仁硯隨毀石不可轉爾當
似龍德正中爾宜企黃爲元吉捻衆美汝能如此安
用詩須識前言亦戲耳

陸客李生未曾相識忽以詩存慰其義不尋常
矣遂次韻答之

謫中何日是歸時滄海茫茫夢亦疑北鴈南賓同我
遠風潮夜咽爲誰悲屈伸未敢論天道生歿唯應祝
聖慈自怪枯形煩問訊異鄉萍水豈前期

再疊

那因遠謫怨清時且學酬金直不疑韓子著書猶說
憤楚臣臨水自生悲清宵北斗思京闕落日孤雲泣
母慈身到瀛洲頭便白祇今無意問安期

三疊

寒林更是日斜時屋上青山似九疑棲盡鵲雞猶悵
望嘶殘櫪馬有餘悲流丸終欲待誰止投杼由來非
不慈千載也應知此意豈須今世遇鍾期

四疊

絕喜逢君寂寞時詩來卽和更何疑窮途已任人情

薄傾盖應隣客意悲只恨山川多險阻誰言天地本
仁慈四迴竄逐皆臨海煙瘴慙慙與我期

大寒以雪漫賦仍寄洛中諸弟要和

天黑地逾白海寒風更翻亂飛連浩渺密積到黃昏
雞犬驚相顧兒童喜自奔臘前豐可驗凍死亦深恩

其二

卽見無前雪仍思以北寒飢鳥驚夜半別鴈叫雲端
江漢舟誰達天星歲又殘玉樓高杳杳不敢問平安
十二月二十四日卽先君諱日也始欲遙設薄
奠因主人家疾疫不果乃曉出城外浦邊北向

拜哭而歸李重發金德恒白喜敏等實從焉其
明日作六絕句以識其哀仍寄示在家諸弟云
餘生獨與餘哀在此地仍逢此日來滄海豈惟通漢
水淚河應復注泉臺

其二

舊日學童三兩人隨吾痛哭水之濱也應行路皆悽
咽缺月寒霜記此晨

其三

憶致崇高出險難明良豈少一堂歡人間尚恨無知
者徙鱷開雲且要看

其四

曳履無聲廊廟空
嶺湖原隰又陳蹤
六年蘭佩行吟處
風馭應臨此海中

其五

發發寒風枯樹枝
兼飄山雪助淒悲
恍疑蘆谷元正曉
三繞封塋灑掃時

其六

百年此日雙行淚
萬里他鄉一箇身
香火可堪依攝事
海山猶不隔精神

除夕

昔余罪配金川值除夕用唐人詩亂山殘雪
夜五字爲韻作五首古詩今來耽羅又逢除
夕仍續作五絕句以孤燭異鄉人爲韻此已
不能無感而前旣自丁丑爲戊寅後又丁亥
戊子矣亦有所謂前期者在耶

非曰無來歲所悲今歲徂堂堂去不顧畱我益羈孤
其二

萬人共不眠無救歲行促吾且任天爲擁衾仍滅燭
其三

歲律諒無停人生本如寄西南再丁戊偶然何足異

其四

去來非二物且問孰維綱只是人多事今宵倍憶鄉

其五

莽莽天連海駸駸騰入春恐孤聞道歿遑歎未歸人

元日之後李華叔

重發字也

來宿其朝對飲書懷

客裏頻驚節序催居然三載大荒隈鏡添白髮迎春
在座有青燈守歲迴南海風濤無日了故園花柳爲
誰開橘林才子雞林李舊感新愁共一杯

偶遊翠屏潭次子瞻遊祖塔院韻

鷗沒春波菱芡香翠屏雲錦對清涼不愁歸路馬蹄

澁要看斜陽帆影長人以佳辰爲舊識天教勝地在
遐方悠然一暢仍千感自是艱難已備嘗

移居南城漫賦

謫舍遷移今再三蠻村隨處着行吟庭前老木閒相
對城上高樓可一臨徒爲困窮無定跡已經危難得
安心東隣有妓時來訪白髮蕭蕭映竹簷

北軒居士集卷之二



